



 www.moh.gov.bn  corp.comms@moh.gov.bn

PERUTUSAN

KEMENTERIAN KESIHATAN

**PERUTUSAN
YANG BERHORMAT
DATO SERI SETIA DR HAJI MOHAMMAD ISHAM BIN HAJI JAAFAR
MENTERI KESIHATAN
SEMPENA
HARI JURURAWAT DAN BIDAN ANTARABANGSA**

12 MEI 2026

TEMA:

**“Jururawat Kami. Masa Depan Kita.
Jururawat Diperkasakan Menyelamatkan Nyawa.”**
(Our Nurses. Our Future. Empowered Nurses Save Lives)

“Bidan: Menambah Sejuta Lagi Bidan”
(Midwives: One Million More Midwives)

1. Setiap tahun, Hari Jururawat Antarabangsa atau *International Nurses Day* (IND) disambut pada 12 Mei dan Hari Bidan Antarabangsa atau *International Day of Midwife* (IDM) disambut pada 5 Mei. Di Negara Brunei Darussalam, Hari Jururawat Antarabangsa dan Hari Bidan Antarabangsa digabungkan dan diraikan serentak pada setiap 12 Mei dan ianya dinamakan sebagai **Hari Jururawat dan Bidan Antarabangsa atau *International Nursing and Midwifery Day* (INMD).**
2. Tema Sambutan Hari Jururawat Antarabangsa pada tahun ini disediakan oleh *International Council of Nurses* (ICN) iaitu **Jururawat Kami. Masa Depan Kita. Jururawat Diperkasakan Menyelamatkan Nyawa (*Our Nurses. Our Future. Empowered Nurses Save Lives*).** Tema ini menekankan kepentingan memperkasakan jururawat melalui penyediaan persekitaran kerja yang selamat, pemberian kuasa amalan penuh (*full practice authority*), peluang kepimpinan, sokongan profesional dan pampasan yang adil. Kesemua aspek ini menyerlahkan peranan kritikal jururawat dalam menyelamatkan nyawa, mengekalkan kelangsungan sistem kesihatan, melindungi komuniti, serta meningkatkan hasil kesihatan di peringkat global.
3. Manakala, tema Hari Perbidanan pada tahun ini ialah **Bidan: Manambah Sejuta Lagi Bidan (*Midwives: One Million More Midwives*).** Tema ini menyeru pelaburan segera dalam pendidikan, pekerjaan, peraturan dan kepimpinan perbidanan untuk menangani kekurangan bidan di peringkat global. Keperluan ini adalah untuk memenuhi 90% keperluan kesihatan seksual dan reproduktif, menangani kekurangan 1.9 juta bidan pada masa ini. Tugas bidan meliputi penyediaan penjagaan penting sebelum, semasa dan selepas kelahiran, termasuk kontrasepsi, penjagaan pengguguran, sokongan penyusuan susu ibu dan perkhidmatan kesihatan yang berterusan. Oleh yang demikian, peningkatan tenaga kerja perbidanan adalah sangat penting bagi

memastikan tahap kesihatan ibu dan anak damit yang baru lahir, dan sekaligus memperkukuh sistem kesihatan di seluruh dunia.

4. Pada masa ini, seluruh dunia juga menghadapi krisis kekurangan tenaga jururawat akibat peningkatan permintaan penjagaan kesihatan, konflik dan perubahan iklim. Penggubal dasar dan pihak yang berkenaan perlu mengambil langkah tegas untuk membangunkan tenaga kerja kejururawatan dan bidan yang kukuh dan mampan disamping memperkasakan kebajikan mereka melalui persekitaran kerja yang selamat, adil, menyokong dan memberikan pengiktirafan yang sewajarnya. Di Negara Brunei Darussalam, beberapa usaha penting telah dan sedang dilaksanakan yang mana antara lainnya ialah:

- a. **Pemeriksaan Kelayakan dan Kemahiran Jururawat dan Bidan**

Pelbagai institusi yang menawarkan kursus bidang kejururawatan dan perbidanan telahpun ditubuhkan di Negara Brunei Darussalam termasuk Institut Pendidikan Teknikal Brunei (*Institute of Brunei Technical Education*, IBTE), Politeknik Brunei (PB), Institut Sains Kesihatan Pengiran Anak Puteri Rashidah Sa'adatul Bolkiah, Universiti Brunei Darussalam (IHSUBD), dan Pusat Perubatan Jerudong Park, Kolej Sains Kesihatan (JPMC *College of Health Sciences* Sdn Bhd, JCHS). Kursus-kursus ini bertaraf sijil, diploma dan juga peringkat ijazah. Profesion kejururawatan dan perbidanan dibukakan kepada lepasan graduan untuk terus menerajui dunia kejururawatan dan perbidanan. Usaha-usaha untuk menarik lebih ramai lagi graduan menceburi kerjaya ini termasuk meningkatkan dan mengemaskini Skim Perkhidmatan Kejururawatan dengan menawarkan jawatan dan

tanggagaji yang menarik, disamping menawarkan kursus-kursus pasca sijil atau diploma kepada diploma ataupun ijazah pengkhususan di bidang-bidang kejururawatan seperti rawatan intensif, Psikiatri, Renal, Kecemasan, Pembedahan, Pediatrik, Kardiologi dan lain-lain. Penempatan jururawat-jururawat yang berkeelayakan dan berkemahiran juga telah disusun atur sebaiknya mengikut keperluan perkhidmatan yang terdapat di hospital-hospital dan pusat-pusat kesihatan.

b. **Memperkasakan Kualiti dan Keselamatan**

Sebagai komponen terbesar tenaga kerja kesihatan di Kementerian Kesihatan dengan jumlah sekitar 43%, berbanding doktor sebanyak 13%, jururawat memainkan peranan penting dalam memastikan kualiti dan keselamatan pesakit. Jururawat dan bidan juga berperanan untuk mengesan dan memperbaiki kelemahan dalam sistem penjagaan kesihatan bagi mengurangkan ralat dan meningkatkan mutu perkhidmatan. Peranan jururawat meliputi pelbagai bidang perkhidmatan kesihatan, termasuk organisasi penyelenggaraan kesihatan, agensi kesihatan awam, klinik kesihatan, penjagaan kesihatan di rumah, pusat pesakit luar, perkhidmatan kesihatan mental, pusat perubatan ketenteraan serta misi perubatan haji.

Dalam memastikan keselamatan pesakit serta keberkesanan penjagaan dan pemulihan, jururawat bertanggungjawab memberikan perkhidmatan yang konsisten, boleh dipercayai dan berteraskan kepimpinan yang berkesan. Mereka juga memainkan peranan penting dalam usaha peningkatan kualiti (*Quality Improvement – QI*) melalui pelaksanaan amalan berasaskan bukti, penilaian secara sistematik, serta penambahbaikan berterusan terhadap penyampaian penjagaan kesihatan bagi mencapai hasil kesihatan yang lebih baik. Bagi

memperkukuhkan budaya keselamatan (*safety culture*) dalam perkhidmatan kesihatan, Kementerian Kesihatan terus giat melaksanakan pelbagai program pendidikan dan kesedaran berkaitan kualiti serta keselamatan pesakit dalam kalangan jururawat. Program-program ini merangkumi latihan induksi untuk jururawat baharu hingga program ulang kaji (*refresher*) kejururawatan, bagi memastikan budaya keselamatan sentiasa diterapkan, diperkukuh dan diamalkan dalam setiap aspek perkhidmatan penjagaan kesihatan.

5. Masalah kekurangan jururawat dan bidan perlu ditangani melalui perancangan jangka panjang yang berterusan, termasuk memberi perhatian kepada kebajikan dan kesejahteraan mereka. Hal ini sangat penting kerana ianya memberi kesan langsung kepada mutu perkhidmatan kesihatan dan juga pembangunan ekonomi negara. Mengutamakan kesejahteraan jururawat dan bidan dapat mempertingkatkan kualiti penjagaan pesakit, mengekalkan jumlah jururawat dan bidan serta menjadikan sistem kesihatan negara menjadi lebih kukuh serta berdaya tahan. Jika kebajikan jururawat dan bidan diabaikan, ia boleh menyebabkan peningkatan ketidakhadiran kerja, tekanan dan kesilapan dalam tugas, yang akhirnya membebankan sistem kesihatan negara.
6. Tema sambutan Hari Jururawat dan Bidan Antarabangsa juga menekankan kepentingan untuk menghargai, menyokong dan melabur dalam kejururawatan dan perbidanan, bukan sahaja sebagai petugas kesihatan tetapi juga sebagai aset penting kepada pembangunan negara dan kesejahteraan masyarakat. Dalam konteks Negara Brunei Darussalam, menjaga jururawat bukan sekadar isu sektor kesihatan akan tetapi ia adalah keutamaan negara selaras dengan matlamat Wawasan 2035 iaitu Pembangunan rakyat yang berpendidikan, berkemahiran tinggi dan berjaya.

7. Akhirnya, sempena Sambutan Hari Jururawat dan Bidan Antarabangsa 2026 ini, Saya menyeru agar semua jururawat dan bidan di Negara Brunei Darussalam terus tabah menghadapi cabaran, sentiasa mengutamakan keperluan pesakit, dan mengekalkan semangat dedikasi dalam menjalankan tugas. Setiap usaha dan pengorbanan anda amat bermakna kepada kesejahteraan masyarakat. Teruskan berkhidmat dengan ikhlas, cekal dan penuh komitmen kerana awda adalah tunjang sistem kesihatan negara. Dengan komitmen dan usaha berterusan, sistem kesihatan Negara Brunei Darussalam akan terus berkembang menjadi lebih mampan, berdaya tahan dan berkualiti tinggi, selaras dengan tema sambutan tahun ini.

-TAMAT-